

Arkitekto Thijsen:

Facilidad Multifuncional di Savaneta completamente di glas

ORANJESTAD (AAN): E proyecto di Facilidatnan Multifuncional (MFA), ta cla pa drenta e fase di destaho, segun a wordo anuncia e siman aki door di Prome Minister Mike Eman. Esey tabata motibo tambe pa presenta e prome tres diseñonan presenta pa e arkitektonan.

E facilidatnan Multifuncional ta edificionan cu lo bay reemplasa e oficinanan auxiliar di Gobierno (Hulpbestuurskantoor) den e cinco districtonan di Aruba. Esaki ta encera cu e Facilidatnan, cu lo bay brinda diferente servicio, mester sirbi como un punto di encuentro pa habitantenan di e barío den e districtonan. Despues di consulta cu habitantenan extensivamente, a inclui ademá di e concepto di loke ta awor e oficinanan auxiliar di Gobierno, tambe por ehempel e servicio di un oficina di AZV, pero tambe areanan pa Biblioteca, Internet Cafe y espacio pa lesnan y actividadnan social y cultural.

E intencion ta cu no mas tarda september, e fase di destaho publico mester ta cla pa por cuminsa cu construcion. Den cuadro di esaki, Gobierno ta bay organisa maintanan di informacion na Dr. Edward Cheung Center for Innovation, unda cu contratistanan lo haya informacion directamente for di e arkitektonan y lo tin oportunidad amplio pa haci pregunta. Intencion ta pa permiti e contratistanan interesa ta bon prepara ora cu habri e Destaho Publico.

Un di e prome tres proyec-tonan cu lo bay den ehecu-cion ta MFA di Savaneta, cual lo wordo construi net patras di e stacion di gasolin na Savaneta. A scoge Arkitekto Ivar Thijsen, di e compania Thijsen Engineering Consultancy

NV, kende tin masha afinidad cu e distrito di Savaneta.

Den e diseño di MFA Savaneta loke ta resalta ta e uzo di glas. E arkitekto a splica cu Savaneta ta conoci como un pueblo di piscado, y a uza glas pa por tin un poco di bista riba e lama. A diseña un entrada basta amplio pa MFA Savaneta, cu ta haci cu na momento cu e ciudadano drenta e no ta sinti su mes isola ni preta, mas bien alivia.

Loke ta interesante ta cu a traha cu e concepto di “smart building” diseñando un edificio pensando riba “berde”. E intencion ta pa uza materialnan mas eficiente posibel y genera mas tanto posibel pa e mesun edificio.

Mescos cu e otro MFA-nan, esun aki lo conta cu un bunita cura y un luga di parkeer amplio. Den e mesun area aki lo tin e seccion di solar panel. Ya caba a wordo calcula cu 20% di e energia cu e edificio lo uza ta bay wordo genera pa e panelnan solar.

E parti abou di e Facilidat Multifuncional di Savaneta ta acomoda e serviccionan di loke awe nos conoce di e oficinanan auxiliar di Gobierno, areanan pa practica y presenta entre otro obranan musica, baile of otro actividadnan cultural, mientras cu riba e di dos piso tin espacio pa conecta riba Internet, Biblioteca, Oficina di Belasting, etc.

Den tur e diseñonan di edificionan MFA a hunga cu claridad, permitiendoli hopi luz drenta paden. Ta uza un tecnologia nobo cu a bini riba mercado, cu ta laga e claridad pasa bin paden y e cayente ta wordo wanta pafo. “Nos ta hopi entusiasmo, sperando riba e mainta di informacion cu e contratistanan dia 4 di juli awor,” Thijsen a duna di conoce.

